

■ GLOSSA

Chaus dovra il pajais. Noss chaus.

DA SILVIO CAMENISCH

Conuschas ti il pajais, nua che creschan ils chaus? Conuschas ti bain? Gist. Chaus dovra il pajais. Noss chaus. Insatge auter na dovri betg. Il sistem da proporz è uschia insatge sco cumplitgà, quel na chapescha nagin. Il sistem da majorz è uschia insatge sco simpel, quel chapescha mintgin. Jau stoss schon avair studegià sin tuttats facultads e deplorablmain era democrazia, vi jau chapir ils dus frars fitg fitg dissumegliants. È in il gist, è l'auter il malgist. Il majorz è l'Abel. Il proporz è il Cain, en noss pajais ha nossa ductrina adina musà uschia.

Mes chau conuschas ti bain. Fiss betg flot, na conuschessas betg mes chau. Jau sun in cuss. naz. Nobody dal pajais. Ma jau hai schon fatg in num giu Berna. Sin social media vesas ti mai insistentmain e persistentmain. Nachhaltig. Jau hai in chau. Guarda mes chau. Mes chau n'è betg da mals geniturs. Nicht von schlechten Eltern, mes chau. Mes chau sa dastga laschar vesair en nossas ritschas serradas da majorzists. Oje. En vossas ritschas serradas da proporzists n'avais vus nagins chaus, mo giabus.



Cun lezs «chaus» faschevan e fan nossas «mummas romontschas» schuppa. Fitg fitg buna schuppa.

Noss surcomité da chaus fitg prudents prova da persvader voss chaus giabus na nagliur prudents per in majorz. Quel è prudent, raschunaivel e bun, tenor noss patratgar uman. Insatge auter na lain nus betg patratgar. Il proporz na chapescha nagin. Na sun jau mez betg dal tut segir, hai jau mez chapì insacur il proporz? Fa nagut. Jau decler perquai tuttina u pir da dretg a l'entir pajais las flaivezzas da spiert, den Schwachsinn, da quest sistem tut auter che gist, per noss pajais. Gist e gistadad democratica èn insatge auter. Noss pajais ha tut auters basegns ch'auters pajais. Noss pajais ha noss basegns.

Il majorz è sa cumprovà, sch'ins dumonda nus. Na sa il proporz ussa betg dir da sai, sch'ins dumonda nus. Ins duess, ins stuess dumandar dapli nus, nus, nus. Nus essan la via e la vardad, tgi che crai enten nus, noss superchaus, vegn ad avair la vita perpetna. Persistenza è qua garantida, là vegn ella prendida, è quai uschè grev da chapir? Noss chaus en exponids mumentan sin social media e daper-tut, er en baselgias. Ina visita sa paja. Las spendas van a las partidas (burgaisas) e vegnan repartidas proporziunalmain, richtig: en pro purziuns e chaus. N'è er nagut auter che dretg e duaivel, en noss pajais.

Nus avain qua ina stizun da chaus, nus faschain qua in'acziun da chaus! Tgi less noss chaus? Dus per in, na fa mal a nagin! Tar vus dastgan ils chaus crudar, tar nus dastgan els star. Majorz è nossa sort, proporz è nossa mort!, en noss pajais. En auters pajais èsi auter. Betg dumandai tge che noss chaus pon far per vus, dumandai tge che voss chaus pon far per nus. Nus essan ils chaus. Navair bels chaus, er esteticamain fitg bels. L'egl votescha gea er adina cun.